



IVstus in Hassia natus & educatus est. Is cū præ-clara indole esset insignis, à teneris annis operā literis dedit, & primis rudimētis perceptis, sese ad uarias Germanię academias contulit. In ijs Græce & Latinæ linguae magna assiduitate incubuit, & earum magnam sibi notitiam comparauit, ut etiā uiris doctissimis annumerari posset. Nam ex Græco Aelianum de uaria Historia, & rerum publicarum descriptiones ex Heraclide in Latinū sermonē transtulit, & 1548 Basileæ edidit. Poliæni quoq; Stratagematum ad D D. Antonium et Verum Imperatores libros octo, quibus amplissima fœcundissimaq; rei militaris doctrina continetur, latinitate donauit. Conuertit præterea epistolas Græcas ab Aldo quondam Venetijs excusas, & in Dione libros aliquot, cum alijs huiusmodi. Hinc factum ut Iustus ob uarias lucubrationes editas cunctis innotuerit, & suam industriam omnibus approbarit. Con. Lycost.